



UPA 2015/56

5/5-2015

Michael Rosing

Aalisarnermut immikkoortitat pillugit Inatsisartut inatsisaata allanngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni isaterinissamut tapiissutinik akiliuteqarnermi aalisarsinnaanermut akuersissutit siunissami atorunaarsinnissaat periarfissaajunnaassalluni.

(Inatsisartunut ilaasortaq Hans Enoksen, Partii Naleraq)

(Siullermeenera)

Demokraatini allatulli kissaatigaarput, Kalaallit Nunaanni aalisarnerup imminut akilersinnaanissaa aalisartunut ataasiakkaanut aamma inuiaqatigiinnut. Aalisarnerup iluani ajornartorsiutaasoq tassaasimavoq aalisariutit amerlasuut pisoqalinikut ullutsinnut naleqqukkunnaarsimanerat taamaattumillu isatertariaqarlutik, angallatit nutaaliat inissaqartilerumallugit. Kisianni aalisartorpassuit aalisariutimik isatertinissaat akissaqartinnngilaat. Taamaattumik angallatit pisoqalinikut isaternissaannut ullumikkut tapiissutit periarfissat arlaqarput. Oqallisigineqarsinnaavoq naapertuunnersoq aalisartup aalisarunnaartinnissaa landskarsip akilissaneraa. Inuiaqatigiilli isigalugit isumassarsiatsialaasinnaavoq angallatit pisoqartaasa ilaasa aalisarunnaarsinnissaa, imminut akilersinnaasumik aalisarsinnaasut inissaqartikkumallugit. Taamaattumiguna aalisarnermut pisassiisarneq atorunnaartartoq angallatip isaternissaanut tapiissutisisoqaraangat. Isigineqarsinnaavoq pisassiissut utertinniarlugu pisinertut.

Isumaqarpugulli naapertuutinngitsoq aalisartut isaterinissamut tapiissutiseriarlutik nutaamik angallatilerlutik aalisaqqilertarnerat. Inatsisartummita qanoq oqassagaluarpas siunnersuutigisuugaluarukku taxaatillip taxaatimi qanganitsertup aserorternissaanut namminersorlutik oqartussat akilertassagaat peqataanilli taxaatillip akuersissut tigummiinnartassagaa aserorterneranullu akissarsiani taxanut nutaanut atorlugit?



Siunnersuut taamaattoq partiip arlaataluunniit ilalernaviangilaa, aamma Demokraatit.

Taamaattumik paasiuminaatsipparput sooq namminersorlutik oqartussat aalisartut angallataat akilertassaneraat, aalisagaqassuseq taama tatineqarsimagallartillugu.

Taamatut oqaaseqarluta siunnersuut itigartipparput.